



UNIVERSIDADE DA CORUÑA

REGULAMENTO DE RÉXIME INTERNO

DO

**DEPARTAMENTO DE ENERXÍA E PROPULSIÓN
MARIÑA**



UNIVERSIDADE DA CORUÑA

EXPOSICIÓN DE MOTIVOS

O presente regulamento vén dar cumprimento ao disposto no artigo 9.3 dos Estatutos da Universidade da Coruña, aprobados polo Decreto 101/2004, de 13 de maio (DOG de 26 de maio).

A regulación do réxime de funcionamento e organización do departamento de Enerxía e Propulsión Mariña fica enmarcada na normativa aplicable á Universidade da Coruña, en concreto na Lei Orgánica 6/2001, de 21 de decembro, de Universidades e no Decreto 101/2004 da Xunta de Galicia, que aproba os Estatutos da Universidade da Coruña, así como pola Lei 30/1992, de 26 de novembro, de réxime xurídico das administracións públicas e do procedemento administrativo común, modificada pola Lei 4/1999, naqueles aspectos que se recollen na presente normativa nos que son de obrigado cumprimento ou que con carácter subsidiario foren de aplicación.

TÍTULO PRELIMINAR. DO ÁMBITO E DO RÉXIME XURÍDICO DE APLICACIÓN

Artigo 1. Obxecto do regulamento

O presente regulamento establece e regula o funcionamento e organización do departamento de Enerxía e Propulsión Mariña.

Artigo 2. Ámbito de aplicación

1. O presente regulamento será de aplicación ao departamento de Enerxía e Propulsión Mariña da Universidade da Coruña, constituído pola/s área/s de coñecemento de Ciencia dos Materiais e Enxeñería Metalúrxica, Enxeñería Mecánica e Máquinas e Motores Térmicos e consecuentemente será de obrigado cumprimento para todos os seus compoñentes en canto membros del.

2. Para os efectos que corresponden ó artigo 10.3 dos Estatutos da Universidade da Coruña, o departamento de Enerxía e Propulsión Mariña estará adscrito á Escola Técnica Superior de Náutica e Máquinas. A sede do departamento localízase no edificio da Escola Técnica Superior de Náutica e Máquinas, no Campus de Riazor.

Artigo 3. Réxime xurídico

1. O departamento de Enerxía e Propulsión Mariña rexerase pola Lei Orgánica de Universidades, polas normas que emanen dos correspondentes órganos do Estado e da Comunidade Autónoma de Galicia no exercicio das súas respectivas competencias, polos Estatutos da Universidade da Coruña e as súas normas de desenvolvemento e finalmente polo presente Regulamento de réxime interno.



UNIVERSIDADE DA CORUÑA

2. En defecto do establecido no presente regulamento aplicarase a Lei 30/1992, de 26 de novembro, de réxime xurídico das administracións públicas e do procedemento administrativo común.

3. Contra as resolucións e acordos dos órganos unipersoais ou colexiados do departamento, poderase formular recurso de alzada no prazo dun mes perante o reitor, tratándose de resolucións do director, e perante o Consello de Goberno, tratándose de acordos do consello de departamento, cuxa decisión esgotará a vía administrativa e será impugnabile perante a xurisdición contencioso-administrativa de conformidade coa lei reguladora desta xurisdición.

TÍTULO I. NATUREZA E FUNCIONS

Artigo 4. Natureza¹

Os departamentos son os órganos encargados de coordinar o ensino dunha ou varias áreas de coñecemento nun ou varios centros de acordo coa programación docente da Universidade.

Artigo 5. Funcions²

Son funcións dos departamentos:

- a. Organizar e desenvolver, nos diferentes ciclos dos estudos universitarios, o ensino propio da área ou áreas de coñecemento da súa competencia.
- b. Apoiar as actividades e iniciativas investigadoras do persoal adscrito á área ou áreas de coñecemento da súa competencia.
- c. Organizar e desenvolver estudos de terceiro ciclo.
- d. Contratar con entidades públicas ou privadas ou con persoas físicas a realización de traballos de carácter científico, técnico ou artístico, así como o desenvolvemento de cursos de especialización.
- e. Participar na elaboración de planos de estudo, no procedemento de selección do persoal docente e investigador e nos procesos de avaliación da calidade institucional.
- f. Calquera outra que lles asignaren as disposicións legais vixentes e os Estatutos da Universidade da Coruña, aprobados polo Decreto 101/2004.

TÍTULO II. DA ORGANIZACIÓN DO DEPARTAMENTO

CAPÍTULO I. DA ESTRUTURA DO DEPARTAMENTO

Artigo 6. Persoal pertencente ao departamento de Enerxía e Propulsión Mariña

O departamento agrupa o persoal docente e investigador da Universidade, funcionario e contratado, o persoal de investigación, bolseiros/as de investigación, estudantes e o persoal de administración e servizos que estean adscritos a el.

¹ Reprodución do artigo 9.1 dos Estatutos da UDC.

² Reprodución do artigo 9.2 dos Estatutos da UDC.



UNIVERSIDADE DA CORUÑA

Artigo 7. Adscrición do profesorado

A adscrición do profesorado a un departamento farase atendendo á convocatoria de cada praza. Ou de acordo co previsto nos Estatutos da Universidade da Coruña.

Artigo 8. Grupos de investigación

O departamento fomentará a constitución de grupos e redes de investigación en que participen os seus investigadores. As relacións entre o departamento e os grupos de investigación en que participen os seus membros acomodaranse á normativa que para este efecto dite o Consello de Goberno.

CAPÍTULO II. DO GOBERNO DO DEPARTAMENTO

Artigo 9. Órganos de goberno do departamento

Para o goberno, representación e administración do departamento establécense os seguintes órganos:

a) Colexiados:

- Consello de Departamento
- Comisión Permanente do Consello do Departamento

b) Unipersoais:

- Director/a de departamento
- Secretario/a de departamento

SECCIÓN PRIMEIRA. DOS ÓRGANOS COLEXIADOS

Artigo 10. Concepto

O Consello de Departamento é o órgano colexiado de goberno do departamento.

Artigo 11. Composición do Consello de Departamento e outras cuestións³

1. O Consello de Departamento comporase:
 - a. Do/a director/a, que o presidirá e convocará, e do/a secretario/a.
 - b. De todos/as os/as doutores/as, profesores/as e axudantes integrados/as no departamento. Enténdese por tales todo o profesorado funcionario dos corpos docentes universitarios e todas as categorías de persoal docente e investigador contratado tal e como se contén nos artigos 69.2 e 3 dos Estatutos da UDC.
 - c. Unha persoa representante dos investigadores con cargo a convocatorias oficiais e, se for o caso, dos/as lectores/as integrados/as no departamento. Enténdese que é investigador/a con cargo a convocatorias oficiais quen, após obter a suficiencia investigadora ou o diploma de estudos avanzados, realice tarefas de investigación

³ Redacción do artigo 31 do Regulamento electoral xeral da UDC, aprobado polo Consello de Goberno en reunión do 20 de outubro de 2004, por resultar este artigo máis amplo que o artigo 33 dos Estatutos UDC.



UNIVERSIDADE DA CORUÑA

- no departamento con cargo a convocatorias públicas nacionais ou autonómicas publicadas nos diarios oficiais.
- d. Unha representación do estudantado do departamento, equivalente ao 25% do número total de membros do consello, dos cales dous terzos corresponderán a estudantes de primeiro e segundo ciclo matriculados en, polo menos, unha das materias impartidas polas áreas de coñecemento integradas no departamento, e o terzo restante corresponderá a estudantes de terceiro ciclo dos programas de doutoramento en que participe o departamento. Dentro da porcentaxe de estudantes de primeiro e segundo ciclo darase preferencia na proclamación como candidato/a electo/a a que haxa polo menos un/unha de cada centro en que o departamento imparte docencia. En caso de non cubrirse o terzo correspondente ao estudantado de terceiro ciclo esa porcentaxe será ocupada por estudantes de primeiro e segundo ciclo e viceversa.
 - e. Unha persoa representante do persoal de administración e servizos adscrito ao departamento. Deberán convocarse eleccións a representantes do persoal de administración e servizos no Consello de Departamento cando o número de integrantes deste sector for superior a un. En caso contrario, será membro do consello sen celebrar eleccións.
2. As persoas representantes no Consello de Departamento serán elixidas por un período de dous anos.
 3. A determinación do número de representantes que corresponde a cada sector será realizada pola Secretaría Xeral coa aprobación do censo definitivo, segundo as proporcións sinaladas neste artigo.
 4. En caso de cesamento de representantes, no prazo máximo dun mes o/a director/a do departamento cubrirá os postos coas persoas candidatas que no último proceso electoral realizado obtivesen o maior número de votos en cada sector sen acadaren representación. Se non as houber, os postos serán cubertos no seguinte proceso electoral, tras a expiración do mandato do Consello de Departamento, salvo que o número de novos postos para cubrir sexa superior á metade do número total de representantes de cada sector, en cuxo caso terán que se convocar eleccións parciais. O mandato dos representantes que así accedan ao Consello de Departamento non durará máis que o tempo de mandato que reste aos demais representantes.
 5. Nos supostos de incremento do número de doutores/as e a súa incorporación ao Consello de Departamento, así como a do resto de membros cuxa porcentaxe dependa daqueles, deberase proceder segundo dispoña o regulamento electoral xeral.
 6. En caso de incumprimento inxustifico desta obriga por parte do/a director/a do departamento calquera persoa interesada poderá solicitar a intervención da Secretaría Xeral, que suplirá a actuación do/a director/a.

Artigo 12. Competencias do Consello de Departamento⁴

Son competencias do Consello de Departamento:

⁴ Redacción do artigo 32.2 dos Estatutos da UDC.



UNIVERSIDADE DA CORUÑA

- a. Elixir o/a director/a e, se for o caso, revogalo/a.
- b. Programar as actividades docentes e eventualmente investigadoras do departamento, elaborar o seu plano de organización docente e propor os programas de doutoramento.
- c. Formular as demandas do persoal docente e investigador.
- d. Organizar cursos ou estudos de posgrao ou especialización dentro do seu ámbito de competencia.
- e. Participar na selección e contratación do persoal docente e investigador.
- f. Propor nomeamentos de doutores/as honoris causa.
- g. Elaborar o regulamento de réxime interno do departamento.
- h. Calquera outra competencia que lle for asignada polas disposicións legais vixentes e polos Estatutos da UDC, aprobados polo Decreto 101/2004 da Xunta de Galicia.

Artigo 13. Funcionamento do Consello de Departamento.

1. O Consello de Departamento reunirse en sesión ordinaria cantas veces sexa necesario e, polo menos, unha vez ao trimestre, e sempre que o/a director/a o convoque por propia iniciativa ou por solicitude do 25% dos seus membros. Tamén se reunirá cando así o soliciten por escrito tódolos membros dunha área das que compoñen o departamento, aínda que estes non supoñan o 25% dos membros de consello. Nestes casos, a sesión realizarase nos quince días seguintes ao de recepción da solicitude.
2. A orde do día das sesións será fixada polo/a director/a tendo en conta, se for o caso, que calquera dos membros do Consello de Departamento poderá solicitar a inclusión dun punto na orde do día. En tal caso, ese punto incluírase na primeira sesión que se convoque, sempre que se solicitase antes de ter enviada a convocatoria.
3. A convocatoria será efectuada polo/a secretario/a do departamento, por orde do/a director/a ou de quen legalmente o substitúa. Esta convocatoria incluírá a data, hora e lugar de realización da sesión, así como a orde do día. As citacións da convocatoria serán cursadas polo/a secretario/a, cando menos, con tres días de antelación, e debe incluír unha orde do día explícita. As citacións levaranse a cabo mediante notificación persoal por carta ao centro de traballo ou notificación en soporte informático con garantías da súa recepción.
4. Cando a natureza dos asuntos que se foren tratar así o requira, a xuízo do/a director/a, poderanse convocar ás sesións do Pleno ou, se for o caso, ás dalgunha comisión ás persoas que se estime necesario, con voz mais sen voto.
5. As sesións extraordinarias do Consello de Departamento están sometidas aos mesmos requirimentos que as ordinarias, coa excepción de que a súa convocatoria pode facerse con só vinte e catro horas de antelación e para o tratamento de puntos de inaprazable consideración. Non se incluírán na orde do día os puntos relativos á aprobación de actas, informes ou suxestións e preguntas.

Artigo 14. Constitución

Para a válida constitución do Consello de Departamento, para os efectos de realización de sesións, deliberacións e toma de acordos, requirirase a presenza do/a director/a e do/a secretario/a ou, se for o caso, de quen os substitúa, e a da metade, polo menos, dos seus membros. De non acadarse este quórum, o Consello de Departamento poderá constituírse



UNIVERSIDADE DA CORUÑA

en segunda convocatoria coa presenza da terceira parte dos seus membros e, en todo caso, a do/a director/a e do/a secretario/a ou, se for o caso, de quen os substitúa.

Artigo 15. Asistencia e desenvolvemento das sesións

1. A asistencia ás sesións dos órganos colexiados da Universidade é un dereito e un deber dos membros que os integran.⁵
2. A condición de membro dun órgano colexiado é persoal e non delegable.
3. Toda ausencia poderá xustificarse con anterioridade á sesión en que se produza perante o/a secretario/a do departamento.
4. Ás sesións só poderán asistir os seus respectivos membros, agás no caso recollido no artigo 13.4.
5. Non poderá ser obxecto de deliberación ou acordo ningún asunto que non figure incluído na orde do día, agás que estean presentes todos os membros do órgano colexiado e sexa declarada a urxencia do asunto polo voto favorable da maioría.
6. Co fin dun mellor desenvolvemento de tódalas tarefas e competencias que lle corresponden, o Consello de Departamento poderá constituir comisións específicas. As comisións terán como función a elaboración de informes e propostas de aprobación ó Consello de Departamento sobre asuntos da súa área de competencias específicas e mais exercer as funcións que lle fosen expresamente delegadas polo consello.
7.
 - a) As comisións específicas estarán compostas, agás que o Consello de Departamento determinase outra cousa, polos seguintes membros:
 - O director do Departamento.
 - Un profesor de cada unha das áreas que forman parte do Departamento.
 - Un estudante de terceiro ciclo.
 - Un estudante de primeiro e segundo ciclo.
 - b) Tódalas comisións serán convocadas e estarán presididas polo director de Departamento, que poderá delegar este cometido nun membro da comisión respectiva. O secretario será elixido entre os seus membros.

Artigo 16. Votacións e adopción de acordos

1. As votacións poderán realizarse por asentimento, por proposta do/a director/a do departamento, a man alzada, pública por chamamento ou secreta. O/a director/a do departamento decidirá a utilización dunha ou doutra modalidade. Porén, a votación secreta poderá ser empregada cando o acordo que se deba adoptar tiver carácter persoal ou o solicite algún dos seus membros asistentes. Considéranse adoptados os acordos por asentimento cando as propostas sometidas ao Consello non suscitaren oposición de ningún membro deste e non requirise outra forma de votación ningún membro.

⁵ Segundo o artigo 23.1 dos Estatutos da UDC.



UNIVERSIDADE DA CORUÑA

2. O Consello adoptará os seus acordos por maioría de votos afirmativos fronte aos negativos, sen ter en conta as abstencións, agás naqueles supostos en que se esixa legal ou regulamentariamente maioría absoluta ou cualificada.
3. En caso de empate nos resultados dunha votación decidirá o/a director/a co seu voto de calidade.
4. Iniciada unha votación, esta non poderá interromperse.

Artigo 17. Actas

1. De cada sesión que teña lugar do Consello de Departamento redactará a acta o/a secretario/a, que especificará necesariamente a relación de asistentes e ausentes que achegasen xustificación, a orde do día da reunión, as circunstancias do lugar e tempo en que tivo lugar, os puntos principais das deliberacións, así como o contido dos acordos e a forma en que estes se adoptaron.
2. Na acta figurará, por solicitude dos respectivos membros do Consello de Departamento, o voto contrario ao acordo adoptado, a súa abstención e os motivos que a xustifiquen ou o sentido do seu voto favorable. Así mesmo, calquera membro ten dereito a solicitar a transcripción íntegra da súa intervención ou proposta, sempre que achegue no acto ou no prazo que sinala o/a director/a, o texto que se corresponda fielmente coa súa intervención, facéndose así constar na acta ou uníndose copia a ela.
3. Os membros que discrepen do acordo maioritario poderán formular voto particular, que farán constar na sesión, e posteriormente presentarán por escrito no prazo de corenta e oito horas, que se incorporará a acta.
4. As actas aprobaranse na seguinte sesión, podendo non obstante emitir o/a secretario/a certificación sobre os acordos específicos que se adoptasen, sen prexuízo da ulterior aprobación da acta.

Artigo 18. Comisión Permanente do Consello de Departamento

1. Poderase crear unha Comisión Permanente, con competencias delegadas do Consello de Departamento. Os acordos que adopte a Comisión Permanente relativos a competencias delegadas polo Consello de Departamento serán comunicados a éste na primeira sesión ordinaria que se realice.
2. A composición da Comisión Permanente será a seguinte:
 1. O/a Director/a do Departamento que a presidirá.
 2. O Secretario do Departamento que o será da Comisión.
 3. Un profesor por cada unha das áreas de coñecemento que forman parte do Departamento.
 4. Un estudante do 3º ciclo que forme parte do Consello de Departamento.
 5. Un estudante de 1º ou 2º ciclo que forme parte do Consello de Departamento.
3. Os membros da Comisión Permanente que non sexan por razón dos seus cargos, serán elixidos polos sectores que representan.
4.
 1. Son competencias da Comisión Permanente:
 - a. Decidir sobre os asuntos de trámite.



UNIVERSIDADE DA CORUÑA

- b. Elaborar e informar tódolos asuntos que lle encomende o Consello de Departamento.
 - c. Calquera outra que lle fose delegada polo Consello de Departamento.
5. A Comisión Permanente reuniráse por iniciativa do director do Departamento, ou a petición de tres dos seus membros.
6. A Comisión Permanente quedará validamente constituída ao estar presente o Presidente e o Secretario, ou quen legalmente os substitúa, e a metade alomenos dos seus membros.
7. A Comisión Permanente renovarase cada ano.

Artigo 19. Comisións do departamento

1. O Consello de Departamento, para os efectos do seu mellor funcionamento ou actuación, poderá constituír comisións con carácter de apoio ou asesoramento e que non terán capacidade decisoria, debendo remitir todas as propostas que se adopten ao Consello de Departamento, que decidirá en última instancia.
2. As comisións estarán compostas polos membros do Consello de Departamento designados por este. A súa renovación levarase a cabo segundo os criterios que estableza o Consello de Departamento, tanto en canto á composición, como na periodicidade da súa renovación.
3. As funcións que correspondan a cada comisión serán asignadas polo Consello de Departamento.
4. Para o seu funcionamento e adopción de acordos, rexeranse polas normas establecidas para o Consello de Departamento no presente regulamento.

Artigo 20. Comisión de doutores

1. A comisión de doutores estará composta por tódolos doutores do Departamento. Estará presidida polo director e actuará como secretario o do Departamento, se fose doctor, ou o doctor máis novo, se non o fose.
2. Son competencias da comisión de doutores:
- a) A elaboración dos anteproxectos e proxectos dos programas de doutoramento, tanto departamentais como pluridepartamentais ou interuniversitarios, para a súa aprobación polo Consello de Departamento.
 - b) Informar sobre a admisión e avaliación dos estudantes do terceiro ciclo, así como da concesión de suficiencia para o desenvolvemento das tarefas de investigación.
 - c) Propo-la asignación de titores ós estudantes de terceiro ciclo.
 - d) Calquera outra que lle fose asignada polo Consello de Departamento.

SECCIÓN SEGUNDA. DOS ÓRGANOS UNIPERSOAIS



UNIVERSIDADE DA CORUÑA

Artigo 21. Do/a director/a do departamento^{6/7}

1. Os/as directores/as de departamento teñen a representación deste e exercen as funcións de dirección e xestión ordinaria destes.
2. Os/as directores/as de departamento son nomeados/as polo reitor logo de elección polo Consello de Departamento entre o profesorado doutor pertencente aos corpos docentes universitarios membro deste ou, no seu defecto, funcionario dos corpos docentes universitarios non doutores/as ou profesores/as contratados/as nos supostos previstos na lei. Neste caso poderá ser de aplicación o previsto no artigo 41.2 dos Estatutos da UDC⁸.
3. De non se poder efectuar o nomeamento do/a director/a do departamento por falta de candidatos/as que reúnan os requirimentos esixidos, unha vez ouvido o Consello de Departamento o reitor encargarlle provisionalmente as funcións de dirección a un/unha dos/as profesores/as do departamento.
4. A duración do mandato será de catro anos, e poderán ser reelixidos/as.
5. Os/as directores/as de departamento cesarán nas súas funcións ao final do seu mandato, por pedimento propio, por causa legal sobrevida ou como consecuencia dunha moción de censura aprobada nos termos que regulamentarmente se establezan.
6. A elección do/a director/a de departamento rexerese por un regulamento elaborado e aprobado polo Consello de Goberno.
7. En caso de enfermidade ou ausencia do director de Departamento, este será substituído como director accidental polo profesor de categoría superior máis antigo do Departamento
8. O Consello de Departamento a petición, como mínimo, dun tercio dos seus membros, poderán someter a moción de censura ao director o cal sería aprobada no caso de obter a maioría absoluta.

Esta moción de censura terá que ir acompañada de un candidato alternativo.

Se a moción de censura non acadase os votos necesarios, consideraríase; e os asinantes desta non poderán presentar outra durante o mesmo mandato.

Artigo 22. Funcións do/a director/a do departamento⁹

⁶ Redacción do artigo 45 dos Estatutos da UDC.

⁷ O procedemento que se debe seguir para elixir os membros de órganos colexiados e unipersoais do departamento regúlase no Regulamento electoral xeral, aprobado para a UDC polo Consello de Goberno en reunión que tivo lugar o 20 de outubro de 2004.

⁸ Art. 41.2. “Serán nomeados polo reitor, logo de elección pola Xunta de Centro, entre o profesorado doutor pertencente aos corpos docentes universitarios adscritos ao respectivo centro”.

No seu defecto, nas escolas universitarias e nas escolas politécnicas, o/a director/a será elixido/a entre o funcionariado de corpos docentes universitarios non doutores/as ou profesores/as contratados/as doutores/as.

Será de aplicación este último precepto cando na elección de profesorado doutor dos corpos docentes universitarios ningún/ningunha dos/as candidatos/as obtivese a maioría absoluta dos membros da Xunta de Centro, e será elixido/a o/a máis votado/a, sempre que teña un número de votos superior ao acadado na elección entre o profesorado doutor”.

⁹ Redacción do artigo 46 dos Estatutos da UDC.



UNIVERSIDADE DA CORUÑA

Correspóndelle ao/á director/a de departamento:

- a. Exercer a representación do departamento.
- b. Presidir e convocar o Consello de Departamento e executar os seus acordos.
- c. Dirixir, coordinar e supervisar as actividades do departamento.
- d. Organizar as funcións de persoal de administración e servizos adscrito ao departamento e controlar o seu cumprimento.
- e. Promover contratos, de acordo co previsto na lei e nos estatutos.
- f. Executar as previsións orzamentarias.
- g. Propor ao reitor o nomeamento dunha persoa, de entre o profesorado e axudantes do departamento, como secretario/a do departamento¹⁰.
- h. Formar parte da Comisión de Selección do Persoal Docente e Investigador Contratado, no caso de que a praza se adscriba ao seu departamento¹¹.
- i. Calquera outra que lle atribúan as disposicións legais vixentes e os estatutos da UDC, aprobados polo Decreto 101/2004, de 13 de maio.

Artigo 23. Secretario de departamento¹²

1. O/a secretario/a do departamento será nomeado polo reitor, por proposta do/a director/a do departamento de entre o profesorado e axudantes do departamento.
2. O/a secretario/a redactará as actas das sesións, custodiará a documentación e expedirá certificacións.
3. Exercerá, así mesmo, calquera outra función que lle delegue o/a director/a de departamento ou que lle encomenden as disposicións legais vixentes e os Estatutos da Universidade da Coruña.
4. Os/as secretarios/as de departamento cesarán por pedimento propio, por causa legal sobrevida ou por decisión do reitor, por proposta do/a director/a do departamento.
5. En caso de ausencia, vacante ou enfermidade, o/a secretario/a será substituído/a polo membro do consello que decida o/a director/a, que reúna na súa persoa a condición de profesor/a ou axudante.

TÍTULO III. DA ACTIVIDADE DOCENTE¹³

Artigo 24. Principios xerais

1. O departamento promoverá como un dos seus obxectivos fundamentais impartir unha docencia de calidade dirixida á formación integral e crítica do estudiantado e á preparación para o exercicio de actividades profesionais.

¹⁰ Artigo 47.1 dos Estatutos da UDC.

¹¹ Artigo 83.2 dos Estatutos da UDC.

¹² Redacción do artigo 47 dos Estatutos da UDC.

¹³ Regulación da actividade docente do Departamento en aspectos como programas, asignación de docencia, avaliación alumnos, etc.



UNIVERSIDADE DA CORUÑA

2. A docencia é un dereito e un deber do persoal docente e investigador do departamento e será impartida baixo os principios de liberdade e responsabilidade, de acordo coa programación docente e os fins xerais da Universidade da Coruña.
3. O departamento é o responsable da docencia de acordo cos planos de estudos das distintas titulacións en que imparta o seu ensino e o plano de ordenación docente aprobado polo Consello de Goberno.
4. O departamento está obrigado a garantir o ensino adscrito á área ou áreas de coñecemento que o integran. En caso necesario, o Consello de Departamento arbitrará as medidas oportunas que garantan a docencia ante situacións de urxencia.

Artigo 25. Organización docente

1. O Consello de Departamento, con carácter anual e antelación suficiente respecto ao comezo do seguinte curso académico, deberá polo menos:
 - a) Fixar e publicar o programa das materias ao seu cargo.
 - b) Determinar as actividades esixidas polos planos de estudo.
 - c) Fixar o sistema ou sistemas básicos e xerais de avaliación do alumnado para cada materia, de acordo co que se estableza para tal fin na normativa da Universidade da Coruña.
 - d) Distribuír e asignar as tarefas docentes entre o profesorado.
 - e) O Departamento comunicará ós diferentes centros, con antelación suficiente, os programas teóricos e prácticos das materias ó seu cargo que se desenvolverán no curso académico seguinte, así como unha relación dos profesores asignados para dispensalas.
 - f) Resolver calquera outra cuestión establecida na normativa elaborada polo Consello de Goberno.
2. As obrigas docentes do profesorado computarán anualmente.
3. O Consello de Departamento planificará as actividades docentes do profesorado visitante e emérito, que poderán estar dirixidas principalmente á docencia en seminarios, cursos monográficos ou de especialización.
4. O Departamento poderá organizar seminarios, conferencias, cursos ou congresos durante o curso académico, por proposta de calquera dos seus membros. Correspóndelle ó Consello de Departamento aprobar esta programación, así como o seu orzamento.
5. Os profesores que dispensen cursos ou organicen congresos, conferencias ou seminarios sen cargo ós créditos do Departamento, poderán solicitar o Consello a súa inclusión na Memoria Anual do Departamento.

TÍTULO IV. DA ACTIVIDADE INVESTIGADORA¹⁴

Artigo 26. Principios xerais

1. O departamento asume como un dos seus obxectivos esenciais a investigación, fundamento da docencia, medio para o progreso da comunidade e soporte da transferencia

¹⁴ Neste ámbito, capítulo II, “Da docencia e da investigación”, do título IV, “Da comunidade universitaria”, dos Estatutos da UDC.



UNIVERSIDADE DA CORUÑA

social do coñecemento. E para tal efecto promoverá no marco das súas competencias o desenvolvemento da investigación así como a formación dos/as seus/súas investigadores/as.

2. A investigación é un dereito e un deber do persoal docente e investigador. Recoñécese e garántese, no ámbito do departamento, a liberdade de investigación individual e colectiva.

3. O departamento garantirá que todos os fondos bibliográficos e infraestruturas para a investigación estean a disposición de todos os profesores ou investigadores do departamento.

4. Os departamentos apoiarán programas de investigación onde se recollerán as liñas de investigación, os proxectos e mailos os recursos de persoal e material necesarios¹⁵.

Artigo 27. Da investigación

1. O Consello de Departamento elaborará e aprobará os programas plurianuais de investigación, onde se recollerán as liñas de investigación, os proxectos específicos e mailos recursos de persoal e material necesario.

2. A devandita programación deberá garanti-la igualdade de oportunidades para realizar investigación.

3. O Departamento poderá contratar con entidades públicas ou privadas, ou ben con persoas físicas, a realización de traballos de carácter científico, técnico ou artístico e mailo desenvolvemento de cursos de especialización, formación ou perfeccionamento

4. O procedemento para a sinatura de ditos contratos será o establecido polo Consello de Goberno da Universidade da Coruña.

5. Tendo en conta os seus programas de investigación, o Departamento poderá propo-la contratación temporal de persoal que colabore no desenvolvemento destes, con cargo os fondos específicos de investigación asinados pola Universidade ou ós procedentes de financiamento exterior.

6. En relación co punto anterior, o persoal contratado con cargo a fondos de financiamento, interno ou externo, non se considerará integrado no Departamento.

7. Para elabora-la Memoria Anual, os profesores e investigadores de Departamento, a instancias da dirección, remitirán ao secretario información sobre os seguintes asuntos:

- a) Liñas de investigación que desenvolvan.
- b) Datos para a actualización do seu currículo académico e científico.
- c) Proxectos de investigación subsidiarios.

Artigo 28. Do persoal docente e investigador

1. O Consello de Departamento poderá facer propostas en relación cos cadros de persoal docente e investigador.

2. Para iso deberanse ter en conta os diferentes centros e campus en que o Departamento ten asignada docencia, co fin de conseguir un reparto equitativo da carga docente entre os seus profesores.

3. A utilización regular dos medios e instalacións do Departamento por persoas alleas a este deberá ser aprobada polo Consello de Departamento.

¹⁵ Artigo 57 dos Estatutos da UDC.



TÍTULO V. DO RÉXIME ECONÓMICO E FINANCEIRO

Artigo 29. Recursos económicos

1. Para a realización das actividades docentes e investigadoras o departamento de Enerxía e Propulsión Mariña dispón:
 - a) Dos bens, equipos e instalacións que, previamente inventariados, a Universidade da Coruña lle destine.
 - b) Dos recursos que nos orzamentos da Universidade da Coruña se lle asignen.
 - c) Calquera outro recurso que puidese serlle atribuído.
2. Corresponde aos órganos de goberno do departamento velar polo mantemento e renovación dos recursos adscritos a este. Da súa conservación directa son responsables todos os membros adscritos a el, e será supervisada pola dirección do departamento.

Artigo 30. Competencias en materia económica

1. O Consello de Departamento adoptará anualmente os criterios para a asignación dos recursos do departamento que serán destinados ao funcionamento deste e á atención das tarefas docentes e investigadoras das áreas de coñecemento que o integran.
2. Corresponde á dirección do departamento:
 - a) Elaborar e presentar anualmente ao Consello de Departamento, para o seu debate e, se for o caso, aprobación, unha estimación dos ingresos e gastos do departamento no seu conxunto co reparto máis pormenorizado posible dos capítulos e unidades de gasto previstos para o exercicio económico seguinte.
 - b) Elaborar e presentar anualmente ao consello, para o seu debate e, se for o caso, aprobación, unha conta xeral dos ingresos e gastos do departamento no seu conxunto, distinguindo capítulos, conceptos e, no que sexa posible, unidades de gasto unha vez rematado cada exercicio económico.

TÍTULO VI. DA REFORMA DO REGULAMENTO

Artigo 31. Iniciativa de reforma do regulamento

Poderán propor a reforma do presente regulamento, o director, ou un terzo dos membros do Consello de Departamento. A proposta de modificación presentarse mediante escrito motivado dirixido ao/á director/a.

Artigo 32. Tramitación de reforma do regulamento

O texto da proposta de reforma será enviado polo/a director/a aos membros do Consello, que disporán de quince días para presentaren emendas. Transcorrido este prazo convocarase sesión ordinaria do Consello para aprobar ou rexeitar a reforma proposta. Á convocatoria xuntaranse as emendas presentadas, que serán sometidas a debate e votación.

Artigo 33. Aprobación da proposta de modificación do regulamento



UNIVERSIDADE DA CORUÑA

Para a modificación do regulamento requírirase a súa aprobación por maioría absoluta do total dos membros do Consello e a súa posterior aprobación polo Consello de Goberno da Universidade.

DISPOSICIÓNS TRANSITORIAS

ÚNICA. Período de adaptación da Comisión Permanente e comisións de traballo

A Comisión Permanente, así como o resto de comisións existentes no departamento á entrada en vigor do presente regulamento extinguíranse no prazo máximo dun mes, debendo conformarse e constituírse a nova Comisión Permanente e demais comisións de conformidade co disposto neste regulamento en dito prazo.

DISPOSICIÓNS DERRADEIRAS

PRIMEIRA. Derrogatoria

Queda derrogado o anterior regulamento interno do departamento.

SEGUNDA. Entrada en vigor

O presente regulamento entrará en vigor o mesmo día en que o aprobe o Consello de Goberno.